

條

麓

堂

集

條麓堂集卷之三十三

永信錄上

翰林院編脩勅命二道

嘉靖四十年九月十五日

皇帝勅曰史臣按善惡見聞之實斷是非去取之疑而撰次之以垂一代之典章厥任重矣然必道德洽聞蔚有時望者廼在茲選爾翰林院編脩張四維文章典雅議論溫醇擢秀大廷升華秘館乃能博綜百氏窮學海之波瀾貫串六經茂詞林之枝葉比官史局益懋進脩而德業日宏聲聞愈顯誠足以副予簡求者已茲所司上爾最績特授爾階文林郎錫之勅命

於戲優游歲課豈鉛槧之是專選取國材實棟梁之  
攸任爾尚益思淬礪以效遠圖朕將觀汝之成也欽  
哉

勅曰凡我臣工宣力於國是必有內助之賢以相之寵  
綏之典不如何以為勸爾翰林院編脩張四維妻王  
氏夙抱懿貞早歸儒彥治內有儉勤之行相夫效儆  
戒之勞宜錫褒恩以旌賢淑茲特封爾為孺人益懷  
兢翼之心永作閨閫之式

其二

皇帝勅曰朕登進儒臣列之史局而必本其所自恩命

有加非獨遂人子顯親之心所以彰善教之功以示  
勸也爾張允齡乃翰林院編脩四維之父嚴重不苟  
好義有聞以幹蠱之才隆其世業以忠信之道聞於  
家邦既乃弘敷義方燕翼令子今爾子振譽詞垣宣  
勞王國祿養褒榮慰爾遲暮福善之徵信不誣也茲  
特封爾文林郎翰林院編脩茂服寵光益堅素履  
勅曰教育兼隆惟母之德與父同也匪均敷錫何以慰  
人子罔極之恩爾王氏乃翰林院編脩張四維之母  
恭儉不渝柔嘉惟則心通書史行協箴圖篤孝敬于  
孀姑明愛勞而訓子顧栝棬輟飲風木感懷用示卹

恩以昭慈懿茲特贈爾為孺人尚其冥漠服此榮恩

左春坊左諭德兼翰林院侍讀誥命二道

隆慶二年四月初一日

皇帝制曰朕惟升儲大慶霈澤庶工而矧備鶴禁之條  
兼侍鑾坡之直望既崇乎華選恩獨侈乎彛章爾左  
春坊左諭德兼翰林院侍讀張四維性資雅重器蘊  
粹和秘館儲英詞垣振藻以抽書金匱則擅美乎三  
長以校藝棘闈則拔尤於多士已而司我綸綍直追  
訓誥之風侍我帷幄悉覽經書之旨洵稱深嚴之地  
共推文學之良是用晉爾階奉直大夫錫之誥命於  
戲金馬清階皇猷繫潤銅龍俊采儲德攸資路已近

手鼎衡才則需乎金礪爾其功專道論忠竭論恩裨  
予配命之常時乃格君之烈欽哉

初任翰林院編脩

二任右春坊右中允兼翰林院編脩

三任  
今職

制曰閨闈之脩有裨士行朝廷之命得並夫榮繁我近  
寮用褒淑媛爾左春坊左諭德兼翰林院侍讀張四  
維妻封孺人王氏甄英華里儷德名流相祀有齋既  
執虔於筐筥主饋無遂尤致謹於衿掣懋鷄鳴儆戒  
之賢式和琴瑟稱象服委佗之德克協史圖茲特加

封爾為宜入敷有赫之綸恩闢無儀之蕙問

其二

皇帝制曰人臣忠國資事父以事君王制尊親因教愛而教敬矧當大賚尤重賜恩爾封文林郎翰林院編脩張允齡乃左春坊左諭德兼翰林院侍讀四維之父字度矜莊性懷倜儻惟孝而友德允洽于家邦洵美且仁善式薰于州里既絢鳳毛之彩尤弘燕翼之詒子為良臣克稱肯堂之嗣汝惟善教足徵作室之庸茲特加封爾為奉直大夫左春坊左諭德兼翰林院侍讀服此華章養復榮於三釜俾爾戩穀慶將衍

於百年

制曰怙恃同恩報不殊於罔極存歿異感恩則厚於並  
崇瞻賢母之令儀宜朝廷之愍冊爾贈孺人王氏乃  
左春坊左諭德兼翰林院侍讀張四維之母動合女  
師行符內則事其親而能孝尤脩蘋藻之誠愛其子  
以知勞誕敷機杼之教賢既符於徙宅而感則起於  
匪莪懿範尚遺冥靈有在茲特加贈爾為宜人祇承  
明命益增廟祐之光永賁幽壙以慰栢椿之慕

掌詹事府事吏部左侍郎兼翰林院學士誥命三道

隆慶三年三月

皇帝制曰朕撫臨四海尊事



兩宮嘉與在廷咸共斯慶况乃舊學之臣寔惟新政之  
助匪殊恩數曷副眷懷爾掌詹事府事吏部左侍郎  
兼翰林院學士張四維器識淵弘風猷凝遠校讐著  
作擅石室之長啓沃論思廣旃帷之益穀收文武鑑  
別幽明久侍

先朝游躋小宰肆予受經之始起爾休沐之餘端尹攸  
資庶常是式

皇考所以遺朕多士方謂得師嘉荅往勞期禪初服特  
授爾階通議大夫錫之誥命於戲說朝夕納誨猶云  
俊乂之旁招且左右灼知惟曰國家之勸相毋負中

秘儲材之託庶幾上臣事君之忠懋乃表儀稱子光寵

初任翰林院編脩

二任右春坊右中允兼翰林院編脩

三任左春坊左諭德兼翰林院待讀

四任翰林院學士掌院事

五任吏部右侍郎兼翰林院學士

六任吏部左侍郎兼翰林院學士

七任今職

制曰夫汪濊之恩匪臣之獨被必暨其室家良顯之效

匪身之獨榮亦庇其伉儷爾掌詹事府事吏部左侍郎兼翰林院學士張四維妻封宜人王氏穆舍內夷敬佐外脩爾君子振譽詞林知爾資其交儆宣勞經幄知爾助其積誠是用加封爾為淑人俾顯附于夫階庶偕承乎主渥

其二

皇帝制曰國有恩紀施及宗祊視官秩之等差為世數之遠近眷茲名彥簡在朕心寵特異于百寮德茂存乎再世爾張誼乃掌詹事府事吏部左侍郎兼翰林院學士四維之祖父鄉閭稱孝獻畝遺安悃濡之風

著為家範詩書之澤貽厥孫謀茲贈爾通議大夫吏部左侍郎兼翰林院學士於戲積厚者流光居崇者報遠時乃天道亦在邦彛幽邈有知微承無斁

制曰詩云孝子錫類不匱朕既以天下奉其

親因推其類以錫天下禮雖未著於令典義則可起以至情爾王氏乃掌詹事府事吏部左侍郎兼翰林院學士張四維之前祖母蚤以婉孌宜其室家賢弗永年歿有餘慕茲從孫貴贈爾為淑人廣予尊

親之澤綏爾孝孫之心

制曰蓋聞蓼蕭之澤自葉以流根豐年之頌烝祖以及

妣又况禁閹之名臣而值國家之大慶介于王母可  
無追崇爾解氏乃掌詹事府事吏部左侍郎兼翰林  
院學士張四維之祖母天與靜貞力持門戶偕老之  
節矢志于中年和鳴之臻卜昌于再世茲贈爾為淑  
人陳情令節之章雖不逮已揚休召祖之廟亦與享  
焉

其三

皇帝制曰朕聞公朝之錫慶念私室之承懽臣子至情  
本不忘于顯國家令典蓋以勸其孝慈爾封奉直  
大夫左春坊左諭德兼翰林院侍讀張允齡乃掌詹

事府事吏部左侍郎兼翰林院學士四維之父履坦  
居貞秉哲迪義博施閭里怡老丘園有子而賢繁爾  
之訓茲加封爾通議大夫吏部左侍郎兼翰林院學  
士韋氏之業為盛一經是貽考父之銘益恭三命而  
俯其承渥惠以輔遐齡

制曰夫朝著有大賚則庭闈有榮名無論幽遐畢被光  
耀惟成子之恩並故資父之愛同爾贈宜人王氏乃  
掌詹事府事吏部左侍郎兼翰林院學士張四維之  
母貴家禮法列傳音暉動應壺彛賢為里式宋榮公  
之德器惟魯是成唐柳氏之宗風匪韓孰振是用加

贈爾為淑人雖不逮左右就養之懽庶以奉春秋  
宴之事

少保兼太子太保禮部尚書武英殿大學士誥命四道萬曆二十九年

皇帝制曰朕尊親立愛錫命疏恩睠茲小大之臣

咸被休嘉之慶矧貳公弼亮式賴忠賢而一德寅恭

克襄孝治不有寵褒之渥曷彰眷倚之懷咨爾少保

兼太子太保禮部尚書武英殿大學士張四維名世

偉人熙朝宿望有博達淵潛之識而本之忱恂有端

方直亮之操而將以勤恪自服官於史局已夙斃乎

英聲游陟宮僚多講幄論思之益升華翰署冠文學

侍從之班旋躋銓部之貳卿克佐建邦之六典

先皇帝用以遺朕俾尹儲闈余一人勞於求賢延登揆  
路感酬知遇弘宣承辟之猷殫竭忠貞式展經邦之  
畧運陶甄於鼎鉉罄謀斷於樞機譽實兼隆勲勞茂  
著允諧朕志庸示眷酬四輔晉秩於春官孤卿加銜  
於殿學茲以覃恩授爾階光祿大夫錫之誥命於戲  
三少之官并今已備五臣之烈自古稱隆卿其勿替  
初忱予以追蹤往哲股肱一體朕將賡喜起之歌師  
保同心爾懃效燮調之績故乃有位永孚於休欽哉

初任翰林院編修



二任右春坊右中允兼翰林院編修

三任左春坊左諭德兼翰林院侍讀

四任翰林院學士掌院事

五任吏部右侍郎兼翰林院學士

六任吏部左侍郎兼翰林院學士

七任吏部左侍郎兼翰林院學士掌詹事府事

八任禮部尚書兼東閣大學士

九任太子太保禮部尚書兼文淵閣大學士

十任今職

制曰賚余良弼恭惟名世之賢宜其家人資于好述之

勛恩禮既隆於朝，寧光華亦逮于閨闈。厥有上彛用  
章內範，爾少保兼太子太保禮部尚書武英殿大學  
士張四維，妻累封淑人王氏克配君子，卓為女師，訓  
服衿紱，肅名家之禮度，動遵桀黷，揚列傳之音徽。繫  
茲相業之光，昭實賴臺儀之淑慎，宜從崇爵，申錫榮  
名，是用加封爾為一品夫人。禕翟斯皇，祇荷鴻休之  
游被，絲綸有赫，式嘉象服之惟宜。

其二

皇帝制曰：朕惟生賢為國應千載之昌期，集善于家衍  
百年之餘慶。耆厚者其施遠，功盛者其報隆。粵有特

恩光于奕世爾張寧乃少保兼太子太保禮部尚書  
武英殿大學士張四維之曾祖父性稟醇良行敦孝  
友含貞抱樸夙高長者之評委批儲麻遠篤曾孫之  
枯相業方茂先德彌昌賴酒醴麴蘖之資重水木本  
原之念茲用贈爾為光祿大夫少保兼太子太保禮  
部尚書武英殿大學士於戲四世而昌垂令名于不  
朽九原可作服峻秩以維新

制曰朕觀圖史所載閭閻之良或恒一德以終身而未  
必自于蚤歲或罹百憂以撫子而未必亢于厥宗惟  
備美以流芳宜曠世而滋顯爾雷氏乃少保兼太子

太保禮部尚書武英殿大學士張四維之曾祖母提  
身貞淑秉性幽閑頷蚤達于所天誓每嚴于儆日既  
鞠孤子復撫孤孫不辭夙夜之拮据用嗣春秋之饋  
享睠予輔弼有懷旂祚之功念爾艱貞宜荷追崇之  
典是用贈爾為一品夫人懿則如存尚重膺于渙渥  
嘉名肇錫庶永庇于雲仍

其三

皇帝制曰朕弘敷慶澤崇答鉅僚勸相國家既獎其贊  
襄之績績戎祖考宜慰其似續之思爰有顯褒以彰  
盛典爾贈通議大夫吏部左侍郎兼翰林院學士張

誼乃少保兼太子太保禮部尚書武英殿大學士四  
維之祖父宅心仁厚秉性樸醇悅禮敦詩德公之遺  
安猷畝履仁蹈義太丘之表正鄉閭是開繩武之賢  
作我調元之佐惟孫謀之克紹知祖德之垂芳茲特  
加贈爾為光祿大夫少保兼太子太保禮部尚書武  
英殿大學士申命自天寵數極中朝之盛嘉享在廟  
宗祊延奕葉之光

制曰家有世德流光施及于子孫國有殊恩命秩兼隆  
于祖妣禮雖或限于令典義則可起以至情惟我重  
臣被茲異數爾贈淑人王氏乃少保兼太子太保禮

部尚書武英殿大學士張四維之前祖母提躬令淑  
作配善良樹懿範于閨闈遺善祥于胤祚雖貽孫翼  
子弗在其身而積功累仁乃昌厥後睠中台之茂績  
邇奕世之徽音是用加贈爾為一品夫人榮名並烈  
祖之光九原增賁靈爽篤孝孫之祐百世彌昌

制曰孫謀貽燕雖本祖功門閥肇興亦資內德故王母  
有介福之寵俾後賢遂報本之思緣情而推惟禮之  
稱爾贈淑人解氏乃少保兼太子太保禮部尚書武  
英殿大學士張四維之祖母幽閒夙稟純懿性成矢  
志靡他不愧共姜之烈保孤能訓武勤文伯之規傳

子而孫益昌且熾匪賴起家之厚澤曷成體國之崇  
勲是用加贈爾為一品夫人天佑宗祊世篤艱貞之  
節國推慶渥光昭垂裕之休

其四

皇帝制曰眷我邦家碩輔忠孝兼資潤色皇猷茂佐中  
天之運瞻依庭訓有懷愛日之誠宜推錫類之隆恩  
用慰尊親之至願爾累封通議大夫吏部左侍郎兼  
翰林院學士張允齡乃少保兼太子太保禮部尚書  
武英殿大學士四維之父慈祥樂善醇樸居貞雅尚  
清修人共推其長厚高年茂德天乃錫之壽康篤啓

嗣賢躋登鼎鉉調元贊化謨謀蓋本自家傳濟美承  
麻勲業豈殊于已出爰酬善誨晉陟穹階茲特加封  
爾為光祿大夫少保兼太子太保禮部尚書武英殿  
大學士於戲惟德致福䟽榮特邁乎等倫移孝為忠  
詒穀無忘于終始服茲休命益介純禧

制曰朕敷慶群工推及其母雖緣情而錫類寔因分以  
致隆有若元寮素承慈訓輔弼之勲既著劬勞之報  
宜崇爾贈淑人王氏乃少保兼太子太保禮部尚書  
武英殿大學士張四維之母勳令女師儀為邦媛相  
夫順正持儆戒以相成治內明章秉靜恭而作範至



成若嗣晉位台司黼藻經綸教未忘于機杼鹽梅調  
燮澤尚戀于栢棧宜荐褒嘉以彰聖善是用加贈爾  
為一品夫人寵章晉錫永貽彤史之芳顯號鼎新用  
作玄扃之貴

少傅張太子太傅禮部尚書武英殿大學士誥命四道

萬曆二十九年七月

皇帝制曰朕精求理道迪簡名賢冀紹脩謨烈之隆用  
敷賁基圖之重帝賚子弼官惟其人貳公宣寅亮之  
勲三載奏奮庸之績宜頒隆異以示倚毗咨爾少傅  
兼太子太傅禮部尚書武英殿大學士張四維涵經  
世之才猷抱佐王之道術有與衍閑深之識而出以

忱恂有端方直亮之操而將之謹恪簡自

肅祖佐我

先皇史局宮僚身久依於日月佐銓長翰望夙重乎樞  
衡洎於朕躬爰立爾相自端尹踐中台之席由秩宗  
躋亞保之班爾乃感特達之深知罄生平之厚蓄敷  
陳堯舜若謂吾君為能殫竭謀猷猶曰我后之德正  
色表儀乎群辟和衷叅決乎萬幾睠茲夷夏之清寧  
寔賴左右之匡弼膺功米上朕志允諧孤卿加帝傳  
之銜四輔晉佐師之秩茂延世賞申霖廷綸切授爾階  
光祿大夫勲柱國錫之誥命於戲朕方詢事以考言

故嘉乃丕績朕甚尊師而重傳故陟爾穹階尚其益  
勵初忱永終令譽唯德唯義道益進于保躬作醴作  
羹忠無忘于訓志登闕上治光輔中興欽哉

初任翰林院編修

二任右春坊右中允兼翰林院編修

三任左春坊左諭德兼翰林院傳讀

四任翰林院學士掌院事

五任吏部右侍郎兼翰林院學士

六任吏部左侍郎兼翰林院學士

七任吏部左侍郎兼翰林院學士掌詹事府事

八任禮部尚書兼東閣大學士

九任太子太保禮部尚書兼文淵閣大學士

十任少保兼太子太保禮部尚書武英殿大學士

十一任今職

制曰朕惟樞機之佐夙夜在公固上臣之事君不有其  
家亦中閭之有淑相在爾室肆舉懋功之典並疏從  
爵之恩國有異章今為異數爾少傅兼太子太傅禮  
部尚書武英殿大學士張四維妻封一品夫人王氏  
誕秀高華儷芳名碩柔嘉自性德咸中乎珩璜靜正  
為儀動一遵夫圖史備茲內美襄我元僚哉寅亮之

崇勲霽申重之寵命是用仍封爾為一品夫人度表山河增賁六珈之飾徽揚江漢祗承三錫之榮

其二

皇帝制曰自古帝王之佐社稷之臣其出也有為而功德所被不止一民一物之微其生也有自而善祥所鍾不止一世二世之積故恩禮特隆于宰輔而寵褒覃及其曾先爾贈光祿大夫少保兼太子太保禮部尚書武英殿大學士張寧乃少傅兼太子太傅禮部尚書武英殿大學士張四維之曾祖父長者之心仁人其行曰唯孝友于兄弟慶澤攸鍾不求聞達于家

邦身名俱隱百年所積三葉而昌若金作礪而旱作  
霖允資弼鉉如水有源而木有本宜霈休綸是用加  
贈爾光祿大夫柱國少傅兼太子太傅禮部尚書武  
英殿大學士穹階峻秩彌彰天錫之隆厚祉餘休益  
篤雲仍之祐

制曰國家尊禮元僚寵頒異數凡追崇其上世得並逮  
于曾闡矧從一居貞亮清白之節保孤永祀開熾昌  
之圖在古不磨于今為烈爾贈一品夫人雷氏乃少  
傅兼太子太傅禮部尚書武英殿大學士張四維之  
曾祖母夙稟慈訓來歸德門中道而失所天失心則

有如日撫一綫之脉更子而孫堅兩髦之儀繫女而士眷經邦之偉績嘉啓祚之弘功是用仍贈爾為一品夫人懿範如新誦栢舟而慕義明恩未艾紀彤管以流芳

其三

皇帝制曰夫幽潛之士厚積在躬而慶每流于後燮理之臣弘施在世而源必濬于先故國家申眷于宗工則恩數特隆于祖考非獨明有始之義亦俾衍無疆之休爾贈光祿大夫少保兼太子太保禮部尚書武英殿大學士張誼乃少傅兼太子太傅禮部尚書武

英殿大學士四維之祖父天子敦龐力行孝弟與物  
無競有仁人長者之風直躬而行無靡麗紛華之習  
蓄其善社開爾聞孫弼予一人如巨川之作楫興于  
再世殆高山之出雲宜有顯褒以彰明德是用加贈  
爾光祿大夫柱國少傅兼太子太傅禮部尚書武英  
殿大學士秩崇上佐丕揚祖廟之光恩貴重原永篤  
相門之慶

制曰夫誦共姜之詩則慕其烈讀令伯之表則哀其情  
然共無聞于立孤而李未膺于追顯孰與我奮庸之  
佐兼隆夫烝畀之儀亮節彌光鴻名並久爾贈一品



夫人解氏乃少傅兼太子太傅禮部尚書武英殿大學士張四維之祖母早以淑媛歸于哲人違偕老之期艱難備歷矢靡他之誓志操逾堅爰翼子以詒孫肆承家而秉國懋著上臣之偉績丕揚王母之徽音是用仍贈爾為一品夫人風教是維為信史必傳之事需恩斯渥慰聞孫欲報之情

其四

皇帝制曰明王立政不惟其官惟其人積善降祥不於其身於其子盖帝賚良弼非偶而天佑善人靡常若乃身居樞筦之司亦有父逮鼎鍾之養造化所篤朝

廷罕傳爾封光祿大夫少保兼太子太保禮部尚書  
武英殿大學士張允齡乃少傳兼太子太傅禮部尚  
書武英殿大學士四維之父樸茂居貞慈祥好施誠  
心直道追三代之遺風達德高年望百齡之厚祉誕  
啓哲嗣躋位台司於身親見其成當世陰蒙其賜載  
酬義訓申錫恩綸是用加封爾光祿大夫柱國少傳  
兼太子太傅禮部尚書武英殿大學士杖履優游為  
天下之大老簪纓烏奕極人間之至榮益迓天休適  
觀相業

制曰母之愛子靡弗知勞而身顯則教益章子之愛親

靡弗知慕而位高則思愈切肆國家有善推之典而  
臣子無不盡之情至我輔相之元僚尤極褒崇之異  
數爾贈一品夫人王氏乃少傅兼太子太傅禮部尚  
書武英殿大學士張四維之母貞姿躬秉淑行性成  
動契閨彞哲問蚤煒於鉛管言符女誠德音未泯於  
圖箴誕育英賢光昭偉烈在清廟而為珪為璧珩璜  
之節彌彰代天工而如綉如綸機杼之風斯顯宜申  
渥寵以報劬勞是用仍贈爾為一品夫人九原煜燿  
彰昊天罔極之恩三錫駢蕃慰大孝終身之慕懿靈  
不昧明命其承

少師無太子太師吏部尚書中樞殿大學士誥命四道

萬曆十年七月杪旨

皇帝制曰朕誕毓胤祥尊崇

慈極肆濟休嘉之澤及于臣工深惟翼贊之勞賴茲輔弼奮庸而宅百揆寅亮以毗一人茂著忠勲宜頒異渥咨爾少師無太子太師吏部尚書中樞殿大學士張四維受天間氣為世偉人學能綜覽百家而歸之大雅才能剴決庶政而本以和衷簡自

先朝素隆揆望暨予初服俾列鼎司叅謀斷於萬幾忠焉能誨樹儀刑於百辟公爾忘私夾輔八年交修一德既晉台衡之首允孚海寓之心蹇蹇匪躬休休下

士贊廟謨以威靈頒宣皇澤而惠慈黎惟景運之熾  
昌由元臣之燮理屬茲大慶嘉乃殊庸師垣兼領乎  
冢卿殿學峻躋于中極恩延奕世寵渙明廷仍授爾  
階光祿大夫勲柱國錫之誥命於戲尹先覺而任阿  
衡旦為師而位冢宰惟卿兼秩視昔有光翼我洪圖  
尚資後勩汝為汝翼益堅篤恭之忠無怠無荒永佐  
雍熙之化欽哉

初任翰林院編修

二任右春坊右中允兼翰林院編修

三任左春坊左諭德兼翰林院侍讀

四任翰林院學士掌院事

五任吏部右侍郎兼翰林院學士

六任吏部左侍郎兼翰林院學士

七任吏部左侍郎兼翰林學士掌詹事府事

八任禮部尚書兼東閣大學士

九任太子太保禮部尚書兼文淵閣大學士

十任少保太子太保禮部尚書武英殿大學士

十一任少傅兼太子太傅禮部尚書武英殿大學士

十二任傅兼太子太師禮部尚書武英殿大學士

十

三

任

今

職

制曰朕惟相道得而國昌妻道得而家理故良臣淑配  
乃風化之攸關從爵疏榮惟彛章之具在爾少師兼  
太子太師吏部尚書中樞殿大學士張四維妻累封  
一品夫人王氏女師稟訓君子作述敬戒無違動中  
珩璜之節惠溫有則行遵圖史之規睠茲鼎軸之宣  
猷繫爾閨闈之協德雖內階已峻而新命宜申茲仍  
封爾為一品夫人秩儗上公祇荷天休於三錫輝騰  
中壺式歌王化於二南

其二

皇帝制曰天子之卿三孤筦樞是寄君子之澤五世奕

葉彌昌位尊者其數隆德茂者其慶遠粵有追崇之  
典用彰湛渥之恩爾累封光祿大夫柱國少傅兼太  
子太傅禮部尚書武英殿大學士張寧乃少師兼太  
子太師吏部尚書中極殿大學士四維之曾祖父溫  
醇天稟孝友躬行直道同三代之民積德應百年之  
運誕貽餘祉佑啓聞孫作朕股肱若巨川之于舟楫  
俾爾昌熾知水木之有本源茲特加贈爾為光祿大  
夫柱國少師兼太子太師吏部尚書中極殿大學士  
厚澤深仁宜食無窮之報穹階峻秩永垂不朽之名  
歿而有知服之無斁



制曰秉節植孤乃閨門之偉行褒貞勵俗實邦國之常  
經矧是後昆為時名佐慶澤聿鍾于累世渥恩宜逮  
其曾闈爾累贈一品夫人雷氏乃少師兼太子太師  
吏部尚書中極殿大學士張四維之曾祖母稟性柔  
嘉褊身靜一蚤罹家難茹辛鞠兩世之孤晚翼孫謀  
作善衍百年之慶報本追遠諒勤輔弼之思渙號推  
恩式表艱貞之節茲仍贈爾為一品夫人徽音如在  
歆綸綍之重申福祚彌昌尚雲仍之永庇

其三

皇帝制曰天生賢而為國有開必先士履道以傳家乃

昌厥後故有崇德報功之典以嘉宅揆熙載之臣爾  
累贈光祿大夫柱國少傅兼太子太傅禮部尚書武  
英殿大學士張誼乃少師兼太子太師吏部尚書中  
極殿大學士四維之祖父遺榮猷畝端軌鄉閭夙稱  
聖世之逸民誕啓熙朝之碩輔經文緯武允為憲于  
萬邦積功累仁實鍾祥于再世聿追潛懿載霑恩綸  
茲特加贈爾為光祿大夫柱國少師兼太子太師吏  
部尚書中極殿大學士龍章有赫丕揚烈祖之休燕  
翼無窮永篤孝孫之祜

制曰家有慶始邇流可以知源國之恩施緣情可以起

義惟我疑丞之重方深似續之思追念前休優加寵  
秩茲惟曠典以答元勲爾贈一品夫人王氏乃少師  
兼太子太師吏部尚書中極殿大學士張四維之前  
祖母毓貞華系儷美哲人壟上並耕能佐龐公之隱  
廡前相敬竟成梁伯之高雖胤祚綿昌非由已出而  
仁慈積累肇啓家聲肆褒三事之良臣偕錫重闈之  
顯秩茲仍贈爾為一品夫人禮嚴祖廟共歆垂裕之  
光澤庇孫枝彌懋續戎之烈

制曰賢哲之生神明所啓方其世業未顯必有積德者  
培其基乃或門祚中微必有秉節者延其嗣賢罔

運夫豈人謀爾累贈一品夫人解氏乃少師兼太子  
太師吏部尚書中極殿大學士張四維之祖母蘭蕙  
為心冰霜比節奉姑而克承乃志鞠子而不墜厥宗  
再世彌昌百揆是宅天意默為之翼相王章特愍其  
艱貞茲仍贈爾為一品夫人於戲共姜誓栢舟之操  
榮豈望于六珈令伯陳烏鳥之情報未聞于一品沐  
茲湛渥賁爾泉臺

其四

皇帝制曰夫大臣樹勲邦國則有錫命之殊榮耆老作  
範鄉閭則有乞言之令典矧子居鼎軸躬履壽康介

茲純嘏之休蔚為聖世之瑞爾累封光祿大夫柱國  
少傅兼太子太傅禮部尚書武英殿大學士張允齡  
乃少師兼太子太師吏部尚書中極殿大學士四維  
之父抱德不試篤行有聞以古人之道善其身以儒  
者之效付諸子輔世之猷丕顯過庭之訓彌彰鹽梅  
調燮于廟堂功猶已出杖屨優游于畎畝祿自天申  
載渙龍光式酬燕翼茲特加封爾為光祿大夫柱國  
少師兼太子太師吏部尚書中極殿大學士百年上  
壽既為人世之希逢一品疏榮尤極王朝之異數尚  
需憲老母替教忠

制曰國有良臣允副調元之托家惟令母式開錫胤之  
祥惟偉績之光昭宜華綸之渚被爾累贈一品夫人  
王氏乃少師兼太子太師吏部尚書中極殿大學士  
張四維之母性鍾婉嫕德備考茲敬潔蘋蘩預卜崔  
門之昌大教勤機杼共推孟母之賢明誕茲名世之  
英作朕代言之弼雖鼎金之養莫遂而栢棬之澤猶  
存緣體至情重申大號茲仍贈爾為一品夫人龍章  
載渙永流女史之芳象服斯皇庶慰相臣之慕

太師誥命一道

萬曆十三年正月十九日

皇帝制曰朝廷軫舊式懷夾輔之勲寵參厚終特貴優

崇之典生克相乎大業歿宜錫以榮名爾原任少師  
兼太子太師吏部尚書中極殿大學士張四維器宇  
端凝才猷練達自蜚英于侍從已徵華國之文迨叅  
預于論思歷試匡時之畧屬更化紀絃轍惟新爾位  
元僚機衡默運宿蠹批而不仁自遠寬條布而群品  
皆蘇睠茲至治之成寔賴交修之助方需後效用佐  
中興胡欒棘以奔歸遽柴瘠而不起倏感騎箕之化  
永遺亡鑑之思愍冊肆頒卹恩滋備特贈爾為太師  
謚文毅錫之誥命於戲周太尉之重厚屬大事以克  
勝韓魏公之真誠折群疑而能斷筭資重美允副褒

綸秩既晉于三公寵實榮于一字緬惟靈爽尚克歆承

特進光祿大夫暨一品夫人誥命一道萬曆十七年

皇帝制曰盛德之傳十世家業方昌公論之定百年國恩未艾瞻茲堂構之績永惟宗社之勞載晉鴻階用光燕翼爾原任光祿大夫柱國少師兼太子太師吏部尚書中樞殿大學士贈太師謚文毅張四維篤生碩輔間氣偉人學術合乎才誠謀畫基於忠謹潤色兩朝之丕業殫敷一德之訏謨道本格心功成造膝除奸剔蠹頓回國脉於和平黜佞登賢一洗士風之



坡險几几方諧於赤烏樂樂已咏於素冠人方望裴  
度之重還天胡奪揚綰之遽速寵數雖窮乎國秩謀  
謨猶繫於朕思茲用爾子甲徵考績進爾階特進光  
祿大夫勲如故於戲阿衡邁德宜伊陟之象賢士燮  
勤身知隨武之有後念爾二子克傳韋相之經惟子  
一人長憶魏徵之鑑尚期靈爽服此休嘉

制曰婦爵從夫已峻中閨之秩母賢視子載揚南國之  
休雖珈禕之貴靡加而絲綸之寵無替茲惟異數亦  
曰曩章爾累封一品夫人王氏乃原任少師兼太子  
太師吏部尚書中樞殿大學士贈太師張四維之妻

兵部職方清吏司主事甲徵之母毓貞名閼作配元  
臣藻蘋贊節於羔羊筦簞鍾祥於麟趾功參調鼎聿  
彰錡金之勞教本斷機克衍絲綸之緒祿養方寧於  
燕喜板輿仍備乎魚軒是用加封爾為一品太夫人  
洊膺七命之榮永介百年之祉

闕喪諭祭文一道

惟萬曆十三年歲次乙酉十月十九日

皇帝遣山西布政司左叅政劉中立諭祭少師兼太子  
太師吏部尚書中極殿大學士張四維曰惟卿問學  
宏深器資端亮勞存吏局望著經緯由翰署而歷踐

清華自宮尹而進參密勿屬當更化爾乃秉樞驅回  
喬而世道一新滌煩苛而民生用乂方賴股肱之助  
遽驚匍匐之歸孝庶移以事君毀乃終于滅性瞻茲  
舊德良軫朕懷諭祭特頒用彰愍卹靈其不泯尚克  
歆承

首七諭祭文

七十七日文同計八道

惟萬曆十三年歲次乙酉十月二十二日

皇帝遣山西布政司左叅政劉中立諭祭少師兼太子  
太師吏部尚書中極殿大學士贈太師謚文毅張四  
維曰惟卿列秩上公作朕元弼克攄忠藎茂樹勲庸

託國政以方殷丁家難而不起奄臨首七良用藍傷  
追念往勞特頒諭祭爾靈不昧服此殊恩

安葬諭祭文一道

惟萬曆十四年歲次丙戌三月十七日

皇帝遣山西布政司左叅政劉中立諭祭少師兼太子  
太師吏部尚書中極殿大學士贈太師謚文毅張四  
維曰惟卿應運而生乘化而往雖儀刑之云邈乃勲  
業之猶存日月不居奄臨窀穸追念君臣之義已全  
終始之恩諭祭申頒靈其歆服

周期諭祭文再周禪除文同計三道

惟萬曆十四年歲次丙戌十月十六日

皇帝遣山西布政司左叅政劉中立諭叅少師兼太子太師吏部尚書中樞殿大學士贈太師謚文毅張四維曰卿以儒望致位公台謨謀歷試于經邦德義允孚乎匡辟自見素冠之去遂虛赤舄之迎泉室長扃周期脩屆顧茲宿莽益增悼傷秩祀敷恩靈其來享後喪諭祭文計二道

惟萬曆十八年歲次庚寅七月十九日

皇帝遣山西布政司左叅政趙燿諭祭少師兼太子太師吏部尚書中樞殿大學士贈太師張四維并妻一

品太夫人王氏曰惟卿以元臣舊德熙載亮工茂宣  
篤業之勞式著匡襄之績亦惟賢淑相爾閨闈委佗  
徵象服之宜警戒得燕私之助嗣賢連起景福方來  
胡不遐齡脩聞長逝並頒諭祭爰示卹恩不泯懿靈  
尚其歆服

惟萬曆十九年歲次辛卯二月二十二日

皇帝遣山西布政司左叅政趙耀諭祭少師兼太子太  
師吏部尚書中樞殿大學士贈太師張四維并妻一  
品太夫人王氏曰睦予良弼久謝人寰茲爾歸藏共  
安窀穸死生契闊終始恩榮諭祭申頒幽靈永慰

附錄奏疏三道

原任兵部武庫清吏司主事等官今丁憂臣張甲徵等謹奏為恭謝

天恩事臣父原任少師兼太子太師吏部尚書中極殿大學士先臣張四維于萬曆十三年十月十六日在籍病故隨該山西撫按官許守謙等具題奉

聖旨張四維先任元輔贊理忠勞應得卹典着禮部從厚查擬來着欽此續該禮部覆題奉

聖旨是准照例與祭葬仍加祭四壇差官造葬還與他謚欽此又該吏部覆題奉

聖旨張四維准贈太師仍廕一子與做尚寶司司丞欽  
此續有中書舍人鄭國俊遵奉欽差賫領山西布政  
使司遵依工部劄付照例給付墳地匠作棺木等項  
銀兩于十四年三月內前到蒲州地方督令官匠擇  
地造墳山西布政司左叅政劉中立遵依禮部劄付  
將欽賜諭祭照例次第舉行至十五年三月十七日  
臣等謹就恩賜新塋奉先臣靈柩安葬訖臣伏念先  
臣張四維生當昌運仕列清班風虎雲龍際千載君  
臣之遇青天白日罄一生忠孝之心雖通顯之存躋  
柰涓埃之未效溘先朝露遽往夜臺仰荷



聖慈特垂愍惻爰稽成憲則從厚之命惟殷洎賜卹恩  
則最優之典咸備太師三公穹秩不吝褒崇司丞六  
品華階乃叨延賞仍循節惠之義肇錫文教之稱加  
遽迥出乎常儀卜兆遠勤乎專使星輶蒞止龍光敷  
賁于松楸天語傳宣雲漢昭回于俎豆允矣備哀榮  
之異數曠然擅臣子之奇逢老穉聳觀共羨湛恩之  
渥山川增色普沾漏澤之施怙德同天獻忱無地茲  
蓋伏遇

皇上交孚開泰覆育體乾舊學不忘豈曰遺簪之棄微  
勞必錄永惟亡鑑之思諒九原感戴以無窮即百世

捐糜而莫報臣等敢不勉承家訓祇戴國恩資事父  
以事君願代撫夫銜結緣死忠而死孝庸何愛于髮  
膚臣等無任悲感激切瀝血銘心之至奉

聖旨禮部知道欽此

其二

原任吏部等部考功等清吏司主事等官今丁憂臣  
張甲徵等謹奏為懇乞

天恩俯賜卹典以光泉壤事臣等謬叨任使待罪卽署  
各供本職間本年四月十七日接得臣弟原任中書  
舍人在籍養病臣定徵家書報稱臣母封一品太夫

人王氏先于本月初八日在家病故臣等聞報驚慟  
五內如焚積罪逮親萬死何贖除即日解任遵例守  
制外伏念臣母自歸臣父原任大學士先臣四維恩  
沐

三朝秩崇一品從爵之義無間始終往年臣父病故荷  
蒙

聖恩賜卹從厚祭葬有加今臣母所有應得賜祭及開  
壙合葬併與臣父並祭各項卹典伏乞

勅下禮部查覆施行臣等草土餘息不勝瀝血哀懇之  
至

其三

原任吏部考功清吏司主事臣張甲徵等謹奏為恭謝

天恩事先因萬曆十八年四月內臣母累封一品太夫人王氏在家病故臣等聞訃隨即具奏請給卹典奉聖旨禮部知道欽此隨該禮部覆題奉

聖旨准照例並祭闡壙合葬仍加祭一壇欽此續該山西布政司依奉禮部勘合行令本司堂上官分守河東道左叅政趙燿諭祭臣父原任大學士先臣四維暨臣母王氏共祭二壇又依奉工部勘合行下平陽

府蒲州給臣家開墾工銀五十兩臣等欽奉聖恩至  
今年二月敬啓先臣之壙奉臣母合葬訖臣等哀感  
交切謹此稱謝者皇慈禮下隆施不替于始終舊學  
承恩殊典兼推于伉儷泉臺增貴海宇稱奇茲蓋伏  
遇

皇上仁齊覆育德並生成追惟輔理之微勞特錫榮哀  
之異數九重命服寵既逮其室家一品卹儀恩更優  
于寵夢臣母王氏糟糠胥戚綸綍分榮爵秩從夫已  
共拜鸞章之煥年齡偕老復同棲馬鬣之封歆遵豆  
之靜嘉均沾湛露依山河之奠祿永賴恩暉臣等敢

不誓畢微生勉圖薄效戴天履地祝萬壽以無疆移  
孝為忠矢百身而靡悔臣等無任瞻天仰聖感戴激  
切之至為此除望闕謝恩外謹此具本專差義男張  
德齋夙捧謹具奏聞

條麓堂集卷之三十四

永信錄下

張文毅公神道碑

上御極之三年蒲坂張公以宮詹晉宗伯大學士入參  
機密又八年秉政踰年以父贈公之喪歸其廬蓋  
上時時念公也嘗顧問左右張少師無恙乎何時服除  
於是朝士大夫騶傳張公且復召海內延頸而望太  
平曰張公且復召然未及召而公卒

上聞震悼輟一日視朝賜祭加等為十三壇遣官治  
葬事贈太師謚文毅廕一子尚寶丞恩卹甚厚焉及

是公伯子甲徵等奉閣學山陰公狀屬余紀其墓誌  
之石余與公共事

三朝自詞林講幄入叅機務先後皆獲從公凡公之論  
議著作與其厝注于國家者皆余所親睹即不斐  
其何敢辭公諱四維字子維別號鳳磐山西蒲州人  
也其先自解徙世以高義聞里中曾祖寧配雷祖誼  
配王繼解父允齡號喟川公配王寔生公以公貴曾  
祖祖父贈封俱光祿大夫柱國少師燕太子太師吏  
部尚書中樞殿大學士妣皆一品夫人具余所為喟  
川公志公生而穎異甫能言解夫人弄之膝上問兒



所欲公亢聲曰欲一當明主康濟天下解夫人大驚  
心知公非凡兒也年十五舉茂才高等督學劉公某  
雅自負少所許可獨竒公年少而才推曰國士嘉靖  
己酉舉鄉試第二人癸丑成進士以庶吉士第一讀  
中秘書乙卯授翰林院編修無何丁內艱服闋補職  
壬戌乙丑兩充會試同考官分校 永樂大典是時  
詞林少事日游教徵逐公獨與同志捷戶讀書自傳  
記諸子百家無不窮詣博覽而尤好深沉之思蓋隱  
然負公輔之望焉袁文榮公嘗以博物策士屬公代  
對立具草袁公嘆曰此真博物君子矣徐文貞公嘗

召諸詞臣集直中語及國計屬公考訂羸縮推利害  
所繇曰此叅政異日憂也隆慶丁卯大典錄成陞  
右春坊右中允予五品服

莊皇帝首御講幄以公充經筵日講官公盟心登對  
多所開發

莊皇帝常諫意聽之是年主順天鄉試尋陞左春坊左  
諭德兼翰林院侍讀戊辰冬請假歸省賜銀幣給  
驛以行及春而復已巳陞翰林院學士尋陞吏部右  
侍郎轉左新鄭高公雅重公椎轂甚亟而同事者意  
忌以為軋已從中撓之公遂以疾乞歸壬申春

上出閣講學慎簡官僚以公充侍班官協理詹事府尋  
掌府事兼教庶吉士無何復引疾歸萬曆甲戌詔  
再起公以原官仍掌詹事府事充

世廟實錄副總裁

肅皇帝在位久章牘浩繁諸司掌故皆闕軼公極意蒐  
討自嘉靖辛卯以後三十五年間朝章邊務國賦人  
才皆犁然具備江陵張公夔然稱服因出舊所編初  
紀者盡屬公筆削乃定乙亥

上簡置弼臣陞公禮部尚書兼東閣大學士入內閣叅  
預機務公既拜命侍

上講讀于便殿 賜公御書一德和衷大字公稽首謝  
出

上以公器度不凡注視者久之丙子充重修 會典總  
裁官丁丑主會試

肅皇帝實錄成加太子太保進文淵閣大學士賜銀幣  
鞍馬戊寅春 大婚以公贊襄六禮勞加少保進武  
英殿大學士廕一子中書舍人庚辰一品滿考加柱  
國少傅無太子太傅廕一子國子生壬午遼左大捷  
以決策功進無太子太師廕一子錦衣百戶世襲凡  
三進秩皆予三代誥命自江陵柄國以刑名一切痛

絕海內其治若束濕人心翬然既沒而親信用事之人尚據要地與權璫為表裏相與墨守其遺法閤中議多齟齬不行公燕居深念間為余言此難以顯爭而可默奪今海內厭苦操切久矣若以意示四方中丞直指令稍以寬大從事而吾輩無深求刻責宜可以少安人心會

皇嗣誕生而公喜可知也曰時不可失乃手疏勸上宜以大慶施惠天下省督責緩征徭舉遺逸恤灾青以養國家元氣而出諸司所擬寬條屬余損益凡數十事以進

上欣然命行之尋以詔恩加公少師吏部尚書中極  
殿大學士廕一子尚寶丞先是席江陵寵者憚公而  
易余故起新昌位余上以逼公及新昌論罷計阻則  
欲設事構隙乃因陽城太宰劾罷御史并劾公御  
史楚人也

上曰元輔忠臣御史何得妄言持其章不下手詔趣  
公出憚公者愈不自安則夤緣罪人爵關說權璫保  
將為公難御史疏再入

上怒鐫御史三級出之外公上疏引咎乞宥言者  
上褒答不許是時璫驕恣甚

上積不能平語浸淫聞外言官亦微知

上指乃共為䟽論爵及保不法狀

上震怒立諭公擬旨曰奴輩盜我威福久其亟誅之乃  
下爵詔獄論死安置保于南京籍其家言者因追論  
江陵事

上欲窮竟其獄公從中救解事得暫已然異時江陵私  
人遣斥殆盡公請 詔臺省舉骨鯁端亮之臣或起  
巖穴或拔自下僚朞月間者賢在列朝宁改觀焉公  
一秉政而滌煩苛鋤荒穢拔根株窟穴之姦于

主上之側其沉謀秘畫有人所不及知者然公口不言

功而言者或攘以為功公亦不自明也蓋自是

上益重公一日

上視朝公立金臺則眩暈欲仆

上曰張先生不耐早寒命中使扶送至閣癸未從駕

閱壽宮陵峻嶺

上顧近侍曰可令二人掖張先生其優眷如此無何  
川公訃至公哀毀不欲生

上特遣中使慰唁微示以奪情意公泣固謝曰臣死且  
不敢

上憐之賜賻襚特厚仍命馳傳給道里費遣行人護行



公辭

上于文華殿勸

上以法祖孝親講學勤政清心寡欲惜財愛民保

終如始因泣下

上為之動容慰勞甚至公歸壽宮閣定

上猶錄公勞遙賜白金文綺廕一子國子生比服闋

上將召公而公疾革不起是為萬曆乙酉十月十有六

日距其生嘉靖丙戌五月十有二日享年六十公孝

友天篤內行甚謹與人交斷斷不能苟合而厚于故

舊不以存亡易心崤川公家居月一馳使定省既聞

計匍匐無程廢寢食道病幾殆甫至家而後母胡夫人亡兩弟又亡公雖病猶強起為經紀喪事宮保楊南澗公知公于髫髻公以國士報既沒而葺其祠諸故人遺孤無所歸公皆衣食之無令失所新鄭去國門下士方首鼠避公時赴宮詹命自獲廩取道會于逆旅江陵嘗以問公公曰昔事高公猶今事公也去而遠之謂交誼何聞者稱服公居恒簡重呐呐如不出口至其臨大事決大疑迎刃立斷目謂賁育不能奪也北虜款貢衆言盈庭謂夷情叵測公于政府力陳便宜乃許王少保嘗曰微吾伯甥幾敗國家事五

開苗叛撫臣募卒討平之或言卒當散遣不且生亂  
公曰有事用之戰事已奪之餉是趣使亂也會滇南  
用兵令一將將以行平緬之役卒賴其用公在閣中  
數為余稱楊文襄公曰本朝經濟國手無如是翁其  
誅瑾一事大有作用可謂振古之豪傑意若深有概  
于文襄者乃公所以扶危定傾安利天下余竊以為  
過之公配王氏儒官恩女初封孺人晉宜人淑人洎  
公大拜後封一品夫人者三有子六人長甲徵兵部  
武庫司主事次泰徵禮部儀制司員外郎次定徵中  
書舍人次乂徵次元徵俱國子生娶皆名族次獻徵

早卒女三人嫁聘皆名族詳在志中甲徵等以下亥  
三月十有七日葬公于蒲之風陵鄉蓋公所自卜壤  
上即以賜公從公志也余按萬曆初端揆之臣當  
天子冲聖拱默政權由已而務文致太平緣飾恩寵  
示威重不可撼上未必得

主之心而下至于盡失天下之心故一去而敗既死而  
人不思及公以除慝逆姦結知

主上稍易前人之絃轍與衆更始

上既推誠相任而海內皆忻忻嚮慕庶幾以振興鴻業  
然公柄事未久而去去當復召而閔然不能須臾

天固未欲幸海內耶何奪公之亟也嗚呼悲哉余故  
景公之大者揭之碑而系以銘曰

翼翼虞都代鍾賢哲佐運匡時有聲烈烈顯允文毅  
應期挺生才為國華行為士程

肅皇之朝雍容載筆挾藻垂鴻鑾坡石室暨事  
穆考執經周旋盟心解頤廣履細旃

冲聖在宥公歸來復勒成信書乃符夢卜

天子曰咨汝作舟霖其代予言其沃朕心公拜稽首對  
揚 休命一德和衷不絀不競乃持大弋易寒為春  
滌煩去苛化瑟維新乃屏儉壬以肅在位射隼于墀

投鼠于器乃徵遺逸寘之天衢澗無考繁場無逝駒  
夙夜劬勞不遑啓處盡瘁厥躬以報

明主

帝眷元臣日寵綏之其顛其危俾掖持之信若著蔡歡  
若魚水君臣之交終如其始素車西邁樂樂棘人豈  
不懷恩非孝無親祥琴在堂蒲輪在路乘箕行天  
公不返顧柄政無何其勲則崇

帝心所懷朝野攸同去則有思沒則有卹何其厚矣用  
酬良弼不墜厥功不隕厥聲于千百年視此刻銘  
特進光祿大夫柱國少師兼太子太師吏部尚書中

極殿大學士知制誥經筵事總裁會典吳郡申時行  
謨

張文毅公墓志銘

蒲坂張公諱四維字子維嘗讀書中條之鳳鳴山學  
者稱鳳磐先生其先世居解州鹽澤元季遷於蒲遷  
蒲後五世秀公是為公高祖秀生孟儒公寧寧生首  
陽公誼誼生崑川公允齡公父也以公貴六拜封命  
累贈三世皆如公官而曾大母雷大母王繼解母王  
皆一品夫人崑川公內操儒行外託什一以游而王  
夫人為少保鑑川公姊有家法以嘉靖丙戌五月十

二日生公公甫能言解夫人膝公微問所志亢聲曰  
願得一當明主康濟天下解夫人大驚當是時已心  
知公非凡兒矣年十五舉茂才高等試輒冠諸生後  
九年鄉舉第二人又四年癸丑成進士以庶吉士第  
一讀中秘書每念國家待士厚士莖莖工輦輓以取  
世資是自薄也於是叅究

累朝典故儀章詢考四方利弊興革務當於實用嘗侍  
徐文貞公語及國計文貞公曰此叅政他日憂也當  
是時公已隱然負鼎鉉之望矣乙卯授翰林編修無  
何奔母夫人喪戊午起家時寵賂滋章公獨有以自



守泊如也壬戌重錄永樂大典公與分校隆慶丁卯  
書成陞右中允兼編修直經筵日講予五品服尋  
陞左諭德兼侍讀代制草清武黃戊辰請告寧  
親賜銀幣給驛歸庚午陞翰林學士掌院事詞林獨  
學不署講讀最重班食都御史上時久虛其銜一旦  
以授公人以此覘公旦暮且大拜也是歲陞吏部右  
侍郎仍兼學士尋轉左明年又引疾請告遣中使  
問疾賜羊酒疏漿久之予告歸會簡東宮侍從起  
公協理詹府尋掌府事教習庶吉士無何復引疾歸  
肅皇帝在位久實錄浩繁開局編摩竟隆慶之世青米

敘也

今上萬曆甲戌再起公以原官為副總裁乙亥進禮部  
尚書兼東閣大學士叅與機務初江陵公手自筆削  
嘉靖初紀僅及十年而公接其後事公故博洽有吏  
才討論潤色悉當江陵公心於是更出初紀屬公定  
焉再踰年書成加太子太保進直文淵閣賜鞍馬  
大婚禮成賜金花銀幣服色加少保進直武英殿廕  
一子秘書 耕藉以公率諸卿終九推馬庚辰一品  
滿賜寶鈔羊酒加柱國少傅兼太子太傅廕一子國  
子生明年以遼左捷功進兼太子太師予武廕世錦

衣百戶公之初拜也

上手書一德和衷四字賜焉時江陵公當國壹務覈刻  
狹登進廣誅戮嚴關傳急催科惡聞災傷喜行聚歛  
最後算緡履畝法令煩苛海內囂然苦之公居其間  
邑邑不得志壬午會江陵公卒是秋

皇嗣誕生加公少師兼太子太師廕一子符丞公乃密  
疏宜下寬大之詔因擬上詔書條格以次罷諸政事  
不便者民懽若更生而故江陵公私人號稱楚黨者  
益目攝公矣初江陵公病亟而楚黨大懼失勢乃詐  
為江陵公遺疏薦起新昌以自代而謀去公先因權

璫保所親信者徐爵結保為內應而外嗾三御史伺間交章排公也於是一御史先論罷王太宰嘗之一御史因重劾太宰連及公

上曰少師忠臣安得為此言特其章不下而手詔公出視事最後一御史再疏則褫官三等出之於外公引咎乞身請宥言者優詔不許而楚黨陰謀者更被劾去當是時

上已心嚮公而銜故用事者無所發怒日望外廷彈章而他御史密測

上意交起抨擊先論爵逋匿禁地交通不法事尋乃論

保歷數保大罪十餘

上大怒曰奴輩盜我威福久矣下爵詔獄論死安置保於南京籍其家或追論江陵公與保表裏為姦狀上益怒欲併籍江陵公逮其諸子公力解之事以故暫已當是時楚黨坐斥殆盡他御史氣益發舒引繩批根猶抨擊不止公乃言於

上治道去太甚耳宜畧苛細存大體從之時六卿半易省署為虛公請詔舉耆碩端亮前時所捐廢者期月間人望畢收朝宇改觀焉公當國未弔歲而遭父喪上嗟嘆惋惜計奪情不可則賻卹有加

慈宮潞邸各致襚焉 面辭文華殿東室勸

上清心勤政節財愛民慎終如始因泣下

上爲動容命乘傳賜道里費遣行人護行公行病疽渡

河創甚踰月乃抵家

上以閔定壽宮遙賜銀幣復廕一子國子生公歸而兩  
弟繼卒後母胡又卒比終制竟以身從焉乙酉十月  
十六日也享年周一甲子訃聞

上輟朝一日賜祭十三壇遣官治葬贈太師謚文毅復  
官一子符丞公爲人孝友篤於故舊人有德一飯不  
忘故人遺孤往往待以舉火公初在詞林與新鄭江

陵二公為莫逆交二公繼在政府有隙新鄭去國而公適赴召命從獲鹿取道會新鄭於樂城江陵公知之迎謂公曰

上方震怒安得私見罪人公曰疇昔事高公猶事公也一親一疎謂交道何江陵嘿然俺酋款塞朝議籍籍鑑川公力持於外而公居中為陳便宜鑑川公嘆曰成吾事者伯甥也楚守臣募卒討五開叛苗苗平議散遣之公曰有事用之戰事已奪之餉後何以使人會滇南有警即命將將此屬以往募卒感奮迄用成功其善謀能斷類此公立朝三十年登政府者九年

當國僅期月耳壬戌乙丑分試禮部者二丁卯典順  
天試一戊辰典武舉試一丁丑典禮部試一是歲暨  
庚辰癸未讀大廷卷三主會武宴一春秋代祀先師  
三 幸太學分獻一 園立方澤分獻四他以扈從  
郊陵閱武賜蟒衣鸞帶麒麟斗牛服繡絛伽袞煖  
壺諸物不可勝計夫人王氏儒官恩之女初封孺人  
晉宜人淑人而封一品者三焉子男六甲徵庫部主  
事恭徵儀部員外郎皆進士定徵秘書久徵元徵國  
子生皆任子獻徵早卒婦楊次孫次楊次羅次楊女  
三長適武選郎馬慥餘皆殤孫男四女二甲徵等將



以丁亥年三月十七日葬公於其所自卜之風陵鄉  
而奉大學士王公狀屬余為志銘納壙中甲徵余歿  
未所取士余因憶辛未從公供事太延受諸士卷輒  
口相雌黃公正色曰

天威咫尺柰何戲豫小黃門往來偵之達

上所矣楚黨排公時余燕見公輒曰久病當去思引天  
下賢者自代其在公乎如是者再余跼蹐不自安無  
何謬被簡命意公或數言余於

上而人不及知也公又為余言欲白新鄭冤請卹而未  
得間今以遺公余出新鄭門下深愧其言三事狀所

不及載者銘曰中條之陽爰有鳳鳴是鍾名碩蔚為  
國禎於文毅公夙稱博雅篤古濟時如宋司馬秘紬  
石室草潤蘭臺始終四紀文直事該

黼幄橫經綸扉補衮道先啓沃民瞻師尹蕩滌新法幹  
旋乾坤斗杓潛運大寒陽春內清姦慝外散黨比龜  
羅巖穴布列庶位老瘝扶杖思見治成化瑟弘張海  
宇廓清惟晉有才五百年後萬曆之功比於元祐荐  
遭家難殉父以身倏棄箕尾莫返蒲輪鳴鳥不聞千  
秋電窅鳳德非衰著茲樂石

光祿大夫柱國少傅無太子太傅禮部尚書武英殿

大學士知制誥經筵事會典總裁新安許國謨

張文毅公墓表

萬曆乙酉冬少師大學士蒲坂張公卒於里第訃聞  
上震悼輟一日視朝 詔贈太師謚文毅官一子丞尚  
寶諭祭者十有三其文明年丁亥公之子兵部主事  
甲徵等塋公於蒲之風陵鄉則公所自卜兆

上遣官為營封樹云公輔政幾十年其正首揆也僅期  
月耳而當鼎革之會夙夜奉公知無不為一切廣  
聖澤厚元元芟憊壬舉遺佚皆出公石畫天下方手額  
公而一旦以憂去竟不獲起故公雖以榮名始終人

猶有憾焉公諱四維字子維別號鳳磐公幼即開敏  
有異大志舉茂才試常為諸生高等己酉舉鄉試第  
二人癸丑成進士以庶吉士入翰林翰林職鉛槧以  
不關聞吏事為高公獨取

累代典故及四方興除利弊反覆研枰時華亭徐文貞  
公雅知公業以公輔期之矣乙卯以編修丁母王夫  
人憂戊午復故官越八年丁卯

莊皇帝改元以重錄大典成晉右春坊右中允予五  
品服充經筵日講官已遷左春坊左諭德兼侍讀而  
公念父嶠川公且老乃給假省視明年還朝又明

年晉翰林院學士掌院事學士最華重不輕授於是  
人爭言張公且相矣已晉吏部右侍郎仍兼學士尋  
轉左辛未引疾乞歸

莊皇帝眷公不許再疏乃許之明年春

今上出閣講讀起公充侍班官協理詹事府事尋掌府  
事無教習庶吉士復引疾歸

上御極之二年甲戌再起公以原官掌詹事府事乙亥  
上手勅晉公禮部尚書兼東閣大學士入贊機務丁丑  
以纂修

肅皇帝實錄成加太子太保進兼文淵閣大學士明年

大婚加少保兼武英殿大學士庚辰以一品滿三年  
加柱國少傅兼太子太傅壬午以遼功加兼太子太  
師又以

皇子生加少師吏部尚書中樞殿大學士前後廕子者  
四方江陵公棟政法令苛急如東濕薪海內謫謫是  
年江陵公卒公因密疏請下寬大詔罷一切法令  
不便者天下曠然若脫轡繫而先是江陵公病將革  
其入幕黨人憚公當軸即不得遂其私乃詐江陵公  
遺疏薦新昌公自代為去公地而大璫馮保居中左  
右之流言籍籍起及一御史疏上

上持之不下。一御史疏又上。

上怒甚，鐫其三秩，斥之外。於是諸黨人稍折氣，內携而言官因其間得遂發。保與江陵公表裏構合，諸姦狀時公猶藉藁私第待罪。

上立召公入，令擬旨。寘之法籍，其家已而皂囊日上，率為諸黨人。諸黨人既以次逐罷，而言者猶不已。公謂除惡務根，他可畧也。言于

上，請一切與之更始。又請拔用海內端直士，舊為江陵公柳棄者，由是公論大明。中外清肅，然公以勞致瘁。

一日在

上前忽眩仆地

上命兩中使掖至閣明年春扈駕閱壽宮

上登山四覽又顧謂近侍掖公

上於公倚毗甚切故恩禮優異如此未幾蜀川公訃

至公號踊孺慕

上遣使慰勞賻贈有加及辭

上于文華殿稽顙進曰臣豎儒幸荷知遇今雖遠離不

勝拳拳之私願

陛下法祖孝親講學勤政清心寡欲情財愛民日

慎一日保終如始



上復慰諭目送之公既重傷媚川公而兩歲間兩弟相繼卒繼妣胡亦卒公煢煢苦寢悲感益集乙酉十月方禪繼妣胡之喪忽暴下不止數日而逝公居常恂恂如書生然深畧內蘊人莫能窺其際至權大事決大議霆擊斧斷亡不中窺隙者江陵公在位久恣胸臆自便公挾持堅定意所必不可江陵公終不能奪之性嚴重寡言笑與人斷斷不苟合然能以意氣假人人樂為用故一肩艱鉅旋乾轉坤之效倚辦俄頃論者方其功不在華亭公下云華亭公故知公於筮仕時乃公亦陰識視華亭公所以間關上下駭機伏

弩之間口銜心算且翕且張時詡詡為不佞言之又  
嘗伏楊文襄翁襄敏兩公氣畧磊砢無書生文吏瑣  
瑣態而惜後人無繼之者意亦陰自許也丈夫故有  
志操左券而前卒與事合嗟嗟使公在位久其耳目  
同事益習且安厯而委蛇養天下以和平之福功烈  
可勝道哉公內行篤備在長安月一使人問嶠川公  
安否其喪也憑棺一慟而仆兩弟歿公已病猶彊起  
經紀其喪新鄭江陵兩公者並有才識交公新鄭公  
得罪去公起家宮端取他道會于逆旅江陵公恠問  
故公曰疇昔之事高公猶今事公也柰何以去而遠

之其敦厚雅素類此當公之里居宅憂且闕也羣小  
憚公嚴忌其復起間私問不佞即蒲州公來當別用  
一番人公自度與之共事合否不佞謹對曰先生誠  
正人也不佞以誠正輔之必合嗟嗟此亦不佞之左  
券也雖時會未償請以質之九原無愧色焉因纂公  
行誼大者授諸孤使附於麗牲之次以詔來許若世  
系姻屬及公厯官受事之詳非 宗社所以重輕茲  
不具載云

賜進士及第資善大夫禮部尚書兼文淵閣大學士  
知制誥經筵事王牒會典總裁太原王錫爵譔

張文毅公行狀

萬曆乙酉十月十六日故少師太學士鳳磐張公卒  
於蒲坂里第厥嗣兵部主事甲徵等告哀於朝

恩命既下乃撫其生平行誼將乞碑誌於名世元老  
以垂不朽而先屬不佞為之狀狀曰公諱四維字子  
維中條有別峰曰鳳鳴山因以鳳磐自號云張氏自  
上世居解州鹽澤南陂元季有思誠公者始遷於蒲  
其子友直公乃占籍焉友直生仲亨仲亨生克亮克  
亮生秀世以高義聞里中秀字彥實是為公高祖生  
孟儒公諱寧配雷氏孟儒公生首陽公諱誼配王氏

早卒繼配鮮氏首陽公生嵎川公諱允齡配王氏今  
少保鑑川王公姊也自孟儒公至首陽公皆以公貴  
累贈光祿大夫柱國少師兼太子太師吏部尚書中  
樞殿大學士自雷夫人至王夫人皆一品夫人而嵎  
川公則親承封命凡六拜制詞焉初孟儒公之卒  
也雷夫人煢煢稱未亡人與其子女依外氏故首陽  
公德外氏為雷翁媼木主祀于家首陽公好讀書居  
常手一編或為鄉人誦說大義恂恂如也嵎川公生  
十年而首陽公卒鮮夫人亦煢煢稱未亡人事雷夫  
人惟謹里中號曰雙節嵎川公孝友仁厚惇信樂義

外託什一以游而內操儒行楚蜀燕瀛之間無不知  
媚川公名王夫人合德而隱以勤儉治家語具申少  
師楊太傅所為誌中

肅皇帝五年而公生公生而穎異甫能言鮮夫人抱持  
膝上問兒所欲公即大言曰欲一當明主康濟天下  
鮮夫人大驚夫人時或不懌則具道異日顯親之具  
以寬適其意未嘗不鮮頤而笑固知公非常兒也七  
歲就外傳動如成人出入必以禮同學者皆嚴重之  
十五舉茂才高等時督學劉公繇翰林出視學政高  
自簡貴鮮所許可見公年少有偉度異之則下堂循

行因睨觀公草草未竟而劉公讀之以爲奇乃特移  
坐堂皇上更數題試公公立就于是劉公嘆服曰蒲  
即多才易得耳若乃國士無雙遂置以爲第一自是  
每試未嘗不第一己酉舉鄉試第二人癸丑成進士  
以庶吉士第一讀中秘書公以爲國家待士厚不宜  
工輦悅取世資以自菲薄於是取國家典故悉研究  
之詢考四方利弊及興革所由無不洞察當是時公  
已隱然負公輔之望矣華亭徐公嚮公甚謂異日濟  
大業者必在公公侍坐語及國計徐公曰此叅政他  
日之憂也其見期望如此乙卯授翰林院編修無何

以母王夫人喪歸戊午起家除原官是時寵賄溢車  
士以造請相尚公獨闢一齋與乾菴馬公正峰孫公  
數人吟誦其中自守泊如也當事者顧尊重公已未  
充 廷試掌卷官壬戌充會試同考官時主考相國  
袁公以博物策士當代對偶病不能具草以屬公公  
對具如袁公指袁公嘆曰真博物君子也八月充重  
錄 永樂大典分校官乙丑復充會試同考官及  
廷試掌卷官

莊皇帝元年丁卯重錄 永樂大典成陞右春坊右中  
允無翰林院編修予五品服充經筵日講官公盟心



登對異有所感悟每至政柄國計宮壺宦寺之類人所難言者未嘗不三致意焉左右侍臣聽之無不灑然變色易容者

莊皇帝肅然敬憚公是秋充順天府鄉試主考官冬陞左春坊左諭德兼翰林院侍讀代草 誥勅兼清武黃戊辰充 廷試受卷官武舉主考官是冬給假歸省

莊皇帝以公講幄勞特賜銀幣仍給驛以行己巳春還朝庚午秋陞翰林院學士掌院事故事學士不攝講讀銜則班僉都御史上途遇閣臣不引避 朝廷重

之未嘗輕授至是特以命公衆翕然謂

天子且相張公矣冬陞吏部右侍郎兼翰林院學士尋  
轉左辛未冬以疾乞歸至再

莊皇帝遣中使問疾賜羊酒蔬漿予告歸壬申春

今上在東朝出閣講學 詔慎簡輔導之臣乃起公充  
侍班官協理詹事府事尋掌府事兼教習庶吉士居  
無何復引疾歸

上踐祚之二年甲戌 詔再起公以原官仍掌詹事府  
事充

肅皇帝實錄副總裁是時峴川公年且七十矣公方朝

夕色養扁所居堂曰愛日聞召不欲行岷川公曰家  
世受國恩未有以稱塞柰何以老人負

明主寤寐旁招意公乃就道蓋公既入都而輿情手額  
具瞻僉願公蚤相

天子乙亥秋手勅陞公禮部尚書兼東閣大學士入  
內閣叅與機務公疏辭優詔不許公既拜命侍  
上講讀于便殿

上以御書一德和衷大字賜公公稽首謝既出

上顧左右曰新輔臣器度與衆不同注視者久之冬至  
駕幸南郊以扈從勞賜公蟒服麒麟服丙子春命

代祀先師秋充重修會典總裁官

聖駕臨雍以公分獻冬至 命分獻于園丘丁丑 命

為會試主考官 廷試讀卷官夏至 命分獻于方

澤秋再 命代祀先師

肅皇帝實錄成 勅加公太子太保進文淵閣大學士

賜鞍馬公之在宮詹也寔專綜實錄編劇事自嘉靖

十年以後凡三十五年間朝章邊務國賦人才暨柱

下仗前之事衆覩記弗詳者公悉殫心探討博證而

精覈之犁然具備再踰年書成江陵公覽而稱善因

出舊所編初紀者盡屬公筆削乃定焉九月 命主

會武宴冬至再命分獻于園丘戊寅春大婚納幣以公充副使賜金花銀幣仍賜蟒服斗牛服各一以贊襄六禮勞勅加公少保進武英殿大學士餘官如故予三代誥命廕一子中書舍人冬扈駕南郊賜蟒服鸞帶諸物己卯三命分獻于園丘庚辰春三命代祀先師

上耕藉田以公充九卿首

上注視公終九推眷禮有加焉三月扈駕謁陵賜

蟒羅繡絛伽袋煖壺諸物廷試再為讀卷官六月

奏一品三年績賜羊酒鈔錠加柱國少傅兼太子太

傳餘官如故再予三代誥命廕一子國子生辛巳春  
扈駕閱武復賜蟒羅帶絛諸物冬四命分獻于  
園立壬午夏再命分獻于方澤六月遼左大捷  
上嘉公運籌功進兼太子太師餘官如故復予三代誥  
命廕一子世襲錦衣百戶先是天下苦江陵公法令  
煩苛吏詭故釣名而民益瘠是月江陵公卒八月邁  
皇嗣誕生公乃因慶典密疏請下寬大詔省督責緩  
征歛舉遺逸賑灾青以培養國家元氣

上憮然曰先生言是亟議行之公乃擬上詔書條格  
罷鑄錢丈田之令欲以漸罷政事不便者詔下郡

國民忻然若更生而楚人故竊弄江陵公政權者皆側目攝公笑九月以大慶加公少師無太子太師吏部尚書中樞殿大學士廕一子尚寶丞初江陵公病時其帷幄私人日夜聚謀憚公等二三當軸臣皆正人且杜群枉路乃詐為江陵公遺疏薦起新昌公于家以自代俟其至首去公約三御史次第為排公疏而紹介逋逃罪人徐爵者往來關說于權璫馮保所保從中可之謀既定於是一御史乃先論罷王太宰一御史因重劾太宰及公

上曰元輔忠臣御史何得為此言持其章不下而手

詔諭公出視事最後御史疏後上

上怒甚奪其官三等出之於外公上疏引咎求歸而併乞宥言者

上褒答不許無何言者發大司空田喬不忠狀司空故所謂帷幄私人也

上遣中使至閣諭欲去司空意公疏對如

上指

上乃勒之致仕居數日言官論奏權璫保及爵表裏為姦歷數其大罪

上覽奏震怒昧爽召公入朝令擬旨曰奴輩擅我威福



久矣必速誅之乃下爵詔獄安置保于南京籍其家  
或追論江陵公與保爵交通毒害忠良狀

上曰此同罪何得無誅欲逮繫江陵公諸子籍其家公  
屢疏救解以為彼誠負

上然

上始終遇臣之禮謂何且國體不宜如是

上猶未允公乃以去就爭之

上重違公意事以故暫已臺諫爭發舒黨人奸狀于是  
諸帷幄私人盡坐斥而猶抨擊不止公言於

上治道去太甚耳宜畧苛細存難道

上從之時六卿半易朝省虛位乃請 詔臺省舉骨鯁  
端亮之臣向所遺棄者布列庶位一時六官之長皆  
民譽云每見必語之曰今

主上神聖公道昭明各舉其職無廢憲度閣臣自不相  
撓也於是事歸六列言歸臺諫公為調劑而奏之更  
一切束濕之政期月之間朝宇改觀焉當是時公值  
鼎革之會鞠躬盡瘁知無不為至廢食息一日

上視朝公立金臺側忽眩暈而歆

上曰張先生不耐早寒耳 命二中使扶送至閣癸未  
春二月詣 天壽山恭閱 壽宮司禮監給器具尋

乃扈駕臨閱

上陟降高山縱覽形勝顧謂近侍曰可用二人掖張先生以登其恩禮隆異如此三月為廷試讀卷首臣是月朔川公卒於家四月訃至京師公哀毀骨立如不欲生

上特遣中使宣諭曰聞卿父辭世朕心甚悼孝情當盡一尤宜節哀以慰朕懷副衆望中使諭

上意欲奪情起公視事公泣曰生不逮養沒不奔喪何顏以立於世為我謝

上臣死不敢奉詔中使具以復奏

上嗟嘆惋惜賜賻襚紵絲六表裏銀三百兩鈔萬貫及  
米油香燭諸物諭祭六壇遣禮部員外郎張志致祭  
主部主事沈一中造塋而王夫人得並祭焉公廷  
辭

上命馳傳賜道里費遣行人護行

聖母及潞王賻襚各有差異日面辭于文華殿稽  
顙奏曰臣行能薄劣日侍左右無所裨益今當遠離  
伏望

皇上法祖孝親講學勤政清心寡慾惜財愛民日  
慎一日保終如始臣不勝悵悵

上答曰先生輔政久朕所倚信茲以憂去其節哀自慰  
稱朕意焉因泣下殿中侍立者皆感動公既辭闕  
無程以奔旦夕哭臨癰生於腋過陝州創甚扶病渡  
河至首陽不能進月餘始抵舍九月

上以閔定壽宮遙賜銀幣廕一子國子生甲申二月癸  
朔川公于勅建新塋葬之日公執紼痛哭徒步十  
餘里奉遷王夫人之柩與蜀川公及繼妣胡氏合窆  
焉輶車所至聚觀如堵見公悲號孺慕狀皆嘆息有  
垂泣者公既痛蜀川公不得一見為永訣而公兩弟  
又相繼卒繼妣胡亦卒公纍纍哀疚卒以身從焉蓋

公初病腋癰繼病耳閉百藥罔效乙酉六月禪峭川  
公之喪而弟室及從子又亡公以盡傷復病脾泄十  
月朔禪繼妣胡之喪公已伏簣不能興矣月之既望  
晨戒僕人具盥漱整巾服扶藉端坐舉手揖空者三  
及昏而逝公天性孝友內行淳篤與人處斷斷不苟  
合而厚於故舊無間存歿初迎峭川公於京邸徵縉  
紳父老為好會以適峭川公意事必咨而後行峭川  
公既歸月一馳使問起居得家書必歛容屏息莊誦  
如侍側或久不至則憂曰吾親得無有所苦乎既登  
鼎足雖身理繁機而心時時念峭川公峭川公之卒

也公歸抵舍憑棺一慟而仆所親或執六十不毀之  
文以解公曰吾拜慶而出銜哀而入吾終天之痛安  
能已也及兩弟之喪公雖病猶強起為之經紀曰吾  
痛吾弟因痛吾親焉宮保楊南澗公自髫年知公南  
澗公沒公為修葺其祠宇坊表執友劉君輩遺孤待  
公而舉火者數十家新鄭江陵兩公皆以才識交公  
驩兩公既輔政凡國家大事皆以咨公公亦盡言  
無所諱新鄭公之去國也公方拜宮詹之命自獲康  
取道與會於欒城入都江陵公謂曰新鄭以得罪  
君父去公柰何見之公曰疇昔之交高公猶今事公也

去而遠之謂交誼何江陵公乃釋然公生平嚴重簡默呐呐如不出口至其臨大政決大疑當機而斷自謂賁育不能奪也北虜款貢衆謂夷情且不測公獨陳便宜于新鄭江陵兩公所甚悉兩公聽之議乃定鑑川公嘗曰微伯甥在內吾事將不諧矣五開苗叛撫臣募卒討破之事平或言募卒皆四方烏合留之且生亂請罷遣歸田里公曰有事用之戰事已奪之餉何以使人是趣使爲亂也會滇南有警即命將將此屬以往疏請留本省征輸備軍興之用所以卒定莽寇之亂者本公之謀云聞中大饑公言於



上出內帑賑窮乏蠲租賦民乃寧其應變定傾皆此類  
公歿十餘日訃聞

上震悼為輟朝一日諭禮部厚擬卹典以聞於是禮官  
奏稱故元輔當深文操切之後而廣

聖恩薦忠讜去恤壬勞績最著請賜祭葬贈謚

上乃命贈公太師謚曰文毅官一子尚寶丞諭祭一十  
有三壇官為營葬則中書舍人鄭國俊山西布政司  
叅政劉中立來致

上命始終恩禮備極隆異焉公配王氏孺官東泉公恩  
之女封孺人宜人淑人各一封一品夫人者三生子

男六長甲徵癸未進士兵部武庫司主事娶楊氏次  
泰徵庚辰進士禮部儀制司員外郎娶孫氏封安人  
次定徵中書舍人娶楊氏封孺人次从徵官生娶羅  
氏次元徵官生娶楊氏獻徵早卒女立長適兵部武  
選司郎中馬慥封安人次字舉人楊燿次字庠生韓  
燦皆早殤孫男四贊聘南氏輩輩質皆幼孫女二公  
生嘉靖五年丙戌五月十二日卒萬曆十三年乙酉  
十月十六日享年周一甲子兵部君甲徵等將以丁  
亥三月十七日葬公于蒲之風陵鄉王庄里侯家庄  
之南公所自卜兆也家屏為公桑梓後進寢踵公武

于詞林初在史局誦公文章見其春容爾雅蔚為宗  
工比從講筵竊窺公學術則見其直諒多聞納乎

聖聽然而未睹公大全也公既居中持國柄乃伏睹公  
憂勞夙夜蹇蹇匪躬以身任天下之重方其筭邪剔  
蠹一日而宇宙回春此與司馬文正公元祐之政豈  
異哉夫文正公晉人也閱數百年而公乃紹美其罷  
新法復舊章同旋乾轉坤之效同而勞瘁以致疾又  
同然逆觀其德則均之以誠心自然為本云不佞何  
能贊公謹叙次公生平而稍為衡槩之如此伏惟名  
世元老覽而財擇焉

賜進士出身嘉議大夫吏部左侍郎兼東閣大學士  
知制誥經筵會典總裁雲中王家屏撰

王太夫人墓誌銘

一品王太夫人者故少師兼太子太師吏部尚書中  
極殿大學士張文毅公配也其稱太夫人以子貴加  
封故按狀諸王於河中為望族有東泉公恩者配馮  
孺人而生夫人夫人生數月母坊失恃乃育于大母  
張孺人所而東泉公客遊于外歲且久夫人不識也  
稍長始從家媼詢馮孺人時事及東泉公狀語輒泣  
數行下比東泉公歸攬衣慟哭伏地不能起見者嗟

異焉長而婉孌有慧性事大母唯謹大母絕憐愛之  
而季父東溪公有人倫鑒奇此女常欲予貴人以是  
偃蹇媒妁者數矣會朱邸中暴者使使強委禽東泉  
公猶豫莫決東溪公恚曰無嚴王孫而輕予女必卻  
之竟謝罷朱邸使者久之乃歸文毅公本東溪公意  
也夫人家故饒及歸張氏食貧乃日椎布操作至脫  
簪珥佐緩急無幾微見顏色文毅公重之嘉靖癸丑  
公登進士讀書中秘其冬夫人如京師乙卯以姑王  
夫人喪從公歸蒲坂戊午服闋從如京師辛酉以公  
編修考績封孺人隆慶戊辰公官諭德以

先皇帝建儲恩封宜人其冬公以省覲告從歸蒲坂是時東泉公歿且十年亡嗣喪未發也夫人歸修窀穸之事甚哀葬竣手植四栢於冢上曰是培塿者而誰主之乎此栢所以識也已又遷張孺人東溪公之兆改厝吉地而封樹之曰吾徵大母季父不及此忍忘厥恩聞者為之感動明年春從公如京師辛未公官少宰以疾告復從歸蒲坂壬申公起家掌詹事府事復從京師其秋以

今上登極恩封淑人萬曆乙亥秋公入相十一月以命婦入朝于慈寧宮明年正月入朝于

慈慶宮各賜彩幣者四戊寅三月 長秋始建入朝于 仁

智殿賜幣如

兩宮踰月以公晉少保封一品夫人庚辰公以一品考績晉柱國少傅夫人封如前壬午公以遼左功晉兼官予世廕夫人封復如之癸未以封公喪復從公歸蒲坂蓋夫人與公出處相從敬相待如賓時燕婉進規益友莫及最後公首總機衡夙夜憂勞天下國耳忘家夫人之助居多初公為編修時嘗再迎封公於邸夫人所以事之謹甚朝夕執饋必躬自洗腆而後進之一錢寸縷不為私藏出納必請於封公不請不

敢發篋封公既歸公歲時遣人問起居上壽夫人必躬治橐中裝務出其厚稱公意焉每傷王夫人無祿御食飲必洩涕久之若不勝哀者其孝德多類是乙酉公薨夫人哭慟甚屢絕而蘇誠諸子治喪母用委巷禮比塋乃徒步從之墓婦人之泣塋也必以輿鮮徒步從者夫人喪舅姑及父與公凡徒步而從塋者四秉禮若莊士人尤以是賢之戊子免公喪趣甲徵泰徵起詣闕而謂定徵留侍我諸子謹受命己丑甲徵以職方主事考績加夫人今封庚寅四月忽遘疾疾革盥饋易服而逝寔是月八日也距生嘉靖壬辰



七月二十九日年五十有九甲徵等以卹典請 詔  
特啓文毅公之寔而合葬焉因

命並祭文毅公籩豆加等稱異渥云夫人性莊嚴不妄  
笑語其動儉慈愛植於天性雖盛饌具供賓祭而饗  
飧無二簋不以鮮醑自給雖好施予親黨貧不給者  
而身衣綈素自象服外無它飾焉雖鞠諸子慈甚而  
所以誨之極嚴有過譙讓夏楚不少貸雖馭群下有  
恩而禁戢甚肅母敢睚眦里中者嗚呼是可以為內  
則也已狀又言夫人幼時有貴徵遇萬仙翁者見而  
竒之曰此女天下貴人也家人心異其言乃夫人生

而都一品拜 七命秩等元臣歿而宗伯致祭司空  
致奠用三公之禮禮之貴名蓋天下竟與萬仙翁之  
言符焉所生六男子甲徵考功主事泰徵精膳郎中  
定徵中書舍人久徵元徵俱官生姻娶皆名家唯獻  
徵殤三女子一適武選郎中馬慥一字舉人楊煊一  
字舉人韓燾皆先卒孫男六贊輦輦質瑩鬻孫女五  
甲徵等將以辛卯二月二十四日奉夫人樞祔於文  
毅公之兆而劄石納壙中請余銘余嘗狀文毅公相  
業謂其有旋乾轉坤之功而本之誠心自然與溫國  
文正公相似尚未及文毅公刑家之化以方文正何

如也乃今觀王夫人懿行無論溫國夫人即以入文  
正公所著家範中寧有異邪且溫國夫人賢而早逝  
不及相業于元祐之朝而王夫人寔相文毅公秉  
大政與助其解紃調鼎之烈繇斯以談王夫人之德  
福視溫國夫人不啻過之矣大都代間有名世之臣  
亦往往有名世之配彼其髫而著貴徵豈偶然哉余  
既誌其事而系之以銘銘曰

蒲文毅公今夔龍手扶日轂升天中坐令八表開昏  
濛刑家化國道所同衿鑿治內何肅雍素絲緝衮輝  
山蟲金鼎大七鹽梅從鸞書屢進夫人封名齊五嶽

班三公入朝長信虔儀容文綺珍紉賜獨豐雲仍奕  
葉慶澤穠瑤瑜成列蘭為叢神隨婺彩還大空佳城  
壁合蟠雙虹黃河蜿蜒條山崇銘石與俱垂無窮  
賜進士出身資善大夫禮部尚書兼東閣大學士知  
制誥經筵起居注王牒總裁雲中王家屏譔

王太夫人行狀

先母一品太夫人姓王氏先世自勝國時為河中著  
姓國初諱思明者占籍蒲之大通廂五世祖仲爵  
高祖琰官福建興化府經歷中年無子乃賙貧拯難  
廣行陰德事晚年遂有丈夫子四人曾祖考緝字朝

用以耆德為鄉飲賓妣姬氏祖考冕字世周有道而  
早卒妣張氏姬孺人朝用公之繼室也朝用公沒時  
年尚少乃勵節撫孤享有耄壽張孺人仰承姑志冰  
蘖益嚴姬孺人有女四人張孺人姊妹五人諸姑姨  
歲時相過言笑盈庭張孺人未嘗一啓齒絕膏沐屏  
文繡嫺戚無不嚴憚之者顯考東泉公恩字希榮事  
母至孝與物無忤以勤儉致富家累千金弟東溪公  
志字希伊以明經為諸生公所以友愛之者甚至顯  
妣馮氏以嘉靖壬辰七月二十九日午時誕生先母  
于下廟巷之居第馮孺人恪慎克孝勤于內職姪子

數不育最後生先母數月而感痿痺之疾醫或以灸灸療之乃竟不起東泉公心傷之為之十年不娶先母以故育于張孺人幼時家人嘗携之門外有萬仙翁者相傳年數百歲言人禍福皆奇中偶過門見先母即以手摩頂謂家人曰此大貴人也可善視之先母聰慧性成凡祖母言動靡不則倣而婉順孝謹又有以得祖母之懽心張孺人及東溪公甚憐愛之私相語曰是兒不凡長必為名家婦年及笄芳譽四達媒聘交至東溪公言于張孺人一切謝絕無所受於是藩府勢方熾則或使人強委禽焉東泉公懾于威

燭將從之東溪公不悅曰此女吾所甚奇必得佳婿  
乃可議婚兄無預吾事即標藩府之使出而卻其幣  
戊申先母年十七歲東溪公以歸我先公蓋是時先  
公亦為諸生以奇才著聞東溪公敬羨之故也值家  
中否用頗不給先母盡出簪珥以奉先祖母王夫人  
侍婢悉遣役于姑所箕帚井臼躬服其勞張孺人聞  
之不慊以充東溪公東溪公曰此暫困當大亨也每  
先母歸寧則泰然自得畧無幾微形言面者張孺人  
益愛重焉己酉八月先公舉于鄉九月先母生先姊  
馬安人因寢疾病得劉醫而愈癸丑先公登進士讀

書中秘乃迎養先祖封少師公于京邸其冬先母如  
京師先母事舅甚謹一蔬一嚮不取成于婢僕先祖  
謂是婦孝後必昌乙卯冬蒲地大震先祖母王夫人  
薨而外氏張孺人及東溪公亦皆罹其變先母盡傷  
厥心聞其哭聲者知其重有憂也戊午先公服闋赴  
京先祖復就養京邸先母益祇事一錢尺帛室無私  
藏子女衣敝垢亦不敢請則取嫁時衣葺補以衣之  
蓋線縷與淚痕至今存也已未東泉公卒于家先母  
以不獲奔喪為恨每哭必慟兒女皆環膝而泣辛酉  
先公以編修考績先母始受勅封為孺人癸亥春



先祖自京邸歸里乙丑春先母寢疾病得李醫而愈  
隆慶戊辰夏先公任諭德以

莊皇帝建儲恩誥封先母為宜人其年冬先公省覲

歸里先母始為東泉公發喪奉馮孺人及繼母崔氏

兩楊氏合塋於是東泉公歿十年矣先母步從號痛

如初喪道路感泣張孺人東溪公前葬未妥至是皆

治壙而遷焉曰吾非祖母叔父無以至今日以是酬

德也時先公以宮坊為文誌墓石外孫輩纍纍然從

事鄉里榮而哀之己巳春先公如京師復任庚午秋

先公晉翰林學士掌院事其年冬再晉吏部侍郎先

母寢疾病得蓋醫而愈時新鄭公當國欲引先公以  
自輔數相過夜飲相與商確時務品騭人材左右竊  
有聞而洩之者先母憂不成寐曰機事戒于不密窺  
伺繁于屬垣柰何防檢之疎若此逾年果有讒慝之  
口先公遂引疾歸先母之沉幾料事多類此者壬申  
夏先公赴堂廡之命其年秋以

今上登極恩 誥封先母為淑人萬曆乙亥八月先公  
入內閣十一月先母入朝于

慈寧宮明年正月入朝于 慈慶宮

兩宮賜彩幣各四襲戊寅二月 長秋始建先母入朝

于 仁智殿賜幣如前三月以

大婚覃恩先公由太子太保加少保

誥封先母為一品夫人庚辰六月先公以一品考績加  
柱國少傅先母再封一品夫人壬午六月先母寢疾  
病得吳醫而愈是月先公以遼左大捷晉無官予世  
蔭先母三封一品夫人癸未三月先祖封少師公薨  
于家先公奔喪至首陽之下病瘍不能起先母扶服  
先入城不視私室為館于樞側而哭奠焉及至窆步  
送至先祖之塋分守大祭王對滄公闔而嘆曰夫人  
貴登極品乃徒步于許里不以輿代可謂盡孝盡禮

矣乙酉十月先公薨先母晝哭仆于地絕而復蘇得  
王醫而愈蒲俗凡初喪賓弔則鼓樂于門先公弗善  
也至是先母以語不孝輩命撤樂曰無為樂哀取譏  
於達者丁亥三月塋先公于

勅建新塋先母復徒步哭從焉凡婦人送葬出城則就  
與鮮能步而至塋者先母始喪先祖母繼喪東泉公  
及先祖先公之喪凡步而至塋者四焉其隆禮由禮  
如此戊子二月先公之喪畢先母召不孝輩泣諭曰  
爾家本儒素爾父勤劬百狀樹立門戶爾等尚慎守  
遺訓勉圖忠孝無墮家聲以貽九原之玷乃命不孝

甲徵奏徵治裝啓行甲徵等叩頭流涕願侍膝下先  
母曰吾固無恙且有汝弟侍側汝等姑出將來迭為  
往還可也甲徵等不能違命則因先母誕辰相率上  
壽以八月下旬行已丑八月甲徵以職方主事考績乞  
恩加封先母為一品太夫人庚寅三月初九日先母不  
豫四月初八日薨于織綿坊新第十七日訃至京邸  
不孝等乃具疏聞上

上乃詔宗伯司空諭祭合葬以一品命婦卹典將事特  
賜先文毅公並祭蓮豆加等焉先是甲徵等辭行先  
母約以次年遣四弟久徵五弟元徵入京拜先公之

遺蔭既而謂其少也不果如約縉紳善三弟定徵者  
屢以書招之甲徵等亦以請于先母令暫出即國歸  
先母語三弟曰汝兩兄皆在外汝年稍長習于事吾  
朝夕依賴汝汝若復出兩弟皆少脫有緩急吾將誰  
倚三弟遂止不行不數月而丁大故藥餌棺衾終始  
藉三弟周旋焉前日之留行殆豫為今日地者嗚呼  
痛哉先母前時產育子女因致清癯又因姊妹六弟  
之亡傷悼屢觸遂多病甚不耐風寒冬月則閉閣擁  
爐不敢外視甚或坐卧榻中足不履地夏月雖盛  
暑衣必綿絮焉自壬午以來夙疾漸愈神氣爽健膚

體充盈夏則親締綌時或揮扇隆冬亦出戶庭抱孫  
以嬉不孝等竊謂否泰相尋先公既已不幸母年尚  
未可量也奉訓趨朝載承恩誥方擬覓差歸里  
舞斑揚解致萱壽之祝焉不謂愍凶之驟及也十七  
之辰猶旅進闕庭為先母謝

封誥歸及晡時而驟得凶問承慊不逮抱恨無窮拜別  
幾何忽成永訣吁嗟天乎何降割之酷也先母天  
性純孝少而失母育于祖母張孺人稍長侍祖母姑  
姨側即咨詢馮孺人遺事見姍戚中子母相依者未  
嘗不歔歔流涕東泉公客遊于外先母年且十齡而

未識父面每念及輒悲咽不自勝比父歸率衣號泣  
見者嗟異焉東泉公有子曰道寧繼室楊出也先母  
視之如同胞時已育不孝輩數人凡襁褓嬉弄之具  
必先道寧而後及兒女道寧疾為之廢寢食歿則慟  
哭致憔悴或慰解之曰茲下殤耳何自苦如是先母  
曰吾父長矣而嗣子未立吾能無悲乎東泉公既歿  
為二親位祠于京邸併祠祖妣張孺人及東溪公過  
忌日皆哭奠歲以為常外氏塋去郭十餘里先母每  
適墓則徘徊竟日不能去既築垣以捍樵牧建屋以  
棲賓客役手植四栢丁東泉公墓所曰吾父無子吾



以此表焉嗚呼悲矣馮孺人有弟竹山公客遊甘涼  
貧不能自歸先母傷母族之零替思切渭陽遣人迎  
竹山公歸衣而廩之為之三娶又有妹適光祿封君  
王公者歲時問遺以姨禮事之如事母焉疾革之日  
猶追悼二親曰父母生我一人今已矣因泣下嗚呼  
此所謂終身慕乎幼時外氏方殷厚比歸先公而家  
用時詘則執勤事姑不私奩具先祖母甚安之泊先  
祖就養京邸旣受封榮貴矣而執勤事舅一如家之  
事姑後先祖家居先公歲時遣人問安上壽先母必  
躬餼襲篋凡儀物之類務極精好稱先公之意處豐

思約恒念及先祖母時輒流涕恨不同享焉先易簀之數日先祖誕辰也猶命兒輩曰今日祖父誕辰當往塋中致奠吾卧病不能行兒等可一往也嗚呼傷哉先母年且六十而父母舅姑不少置念終身以之將天與至性全而歸之者與先母少依祖母張孺人孺人性端嚴雖鍾愛先母而每事必規誨先母婉婉聽從步趨唯謹凡中饋女紅諸務無所不究心故其佐先公也凡致養承祀脩滫簋組之事必躬必親又最喜儉約一絲一粒未嘗妄費常服率澣滌再三非賓祭不御文繡飲食務從其菲者雖存濟貴顯服食

淡素不變塞焉每語不孝等曰汝曹賴父廕庇免于  
饑寒然天物不可暴殄吾初至汝家見汝父攻苦食  
貧養汝祖母吾至今念之有餘悲也汝曹可無惜福  
乎素性方嚴莊肅不妄笑語先公相與白首祇敬如  
賓鞠諸孤雖甚慈而極嚴于訓誨有過則譙讓或憂  
楚之不少貸比其悔改然後假以辭色或撫其創痛  
而泣曰吾非不慈誠不忍汝為不肖子也不孝等稍  
長成晨昏定省必整容而後延見其勤儉嚴毅蓋天  
性固然而得之張孺人者亦多也 外氏及先祖母  
以來皆奉觀音大士于中庭先母繼其香火久而彌

虔于所謂慈悲方便者不須史釋念也聞人有厄難  
則怵惕惻隱為之色憂聞啼餓號寒之聲未嘗不賑  
恤有為橋梁道路之役者必捐貲以濟之眷屬中有  
無告者必閔焉經畫覆庇務令得所馭群下嚴而有  
恩誥誤之失多所原宥比還里尤禁戢僮僕不得陵  
暴小民一日板輿過衢市有醉者衝突儀衛諸僕競  
逐之先母不懌曰彼醉故然何足與較爾輩第知依  
勢作威不知為吾結怨鄉里也如以傷人抵罪天理  
王法自不可逭吾豈能援爾乎因與諸孤各諭戒其  
下云 先公歿後既免喪先母忽命諸孤曰人生瞬

息容貌易改可及我形神未衰傳真數幅豈不善哉  
兒盡為我亟圖之于是擇日自具命服臨坐中堂命  
工傳寫了無俗忌洎疾甚乃召珖定徵受遺命曰我  
旦夕且逝首加青布巾衣裳襪履皆以白布為之勿  
華勿費慎無用帛聽之無違疾大漸遂令侍者燂湯  
強起澣浴曰無令身有積垢浴畢命取所製布服視  
而易之兒輩涕泣欲且止先母曰我婦人也須早飭  
蔽體之服豈可如爾父既歿更衣耶頃之曰吾歸矣  
可令有道者示我歸路一道人言夫人素奉大士可  
專心誦佛兒輩以白先母先母首肯乃合掌作敬誦

佛數聲而薨其契違幽明始終不亂如此 先母生  
于嘉靖十一年壬辰七月二十九日午時薨于萬曆  
十八年庚寅四月初八日寅時享年五十有九初封  
孺人晉封宜人淑人又晉封一品夫人者三最後加  
封一品太夫人凡七拜

恩綸貴至極品符萬仙翁之記焉凡生不孝等男六人  
長甲徵吏部考功司主事娶楊氏封安人次泰徵禮  
部精膳司郎中娶孫氏封安人次定徵中書舍人娶  
楊氏封孺人次久徵官生娶羅氏次元徵官生娶楊  
氏次獻徵早殤女三人長適兵部武選司郎中馬慥

封安人生二子三女而卒次字舉人楊煊次字舉人  
韓曠皆早殤孫男六贊聘南氏輦聘王氏輦聘羅氏  
質瑩蘭俱幼孫女五長適庠生許廓然餘幼塋地在  
王庄里

勅建文毅公新塋葬期在十九年二月二十四日

嗚呼痛哉不孝輩幼入家塾或先公以職務所羈不  
暇課子先母則代為程督畧無姑息冬夜恒蓄火雞  
初鳴必呼之起或侍婢眠熟則自起舉燭令不孝輩  
帳中溫習以為常或以頑愚曠業見怒先公先母必  
陽為之解而陰召不孝輩垂涕責之曰吾辛苦鞠育

冀爾有成乃不自力學至勤爾父督過吾何望耶不  
孝輩莫不感奮所以幸不墮落者秋毫皆父母之訓  
也所恨粗有成立驟失怙恃劬勞罔極圖報亡繇奄  
奄餘息不如死之義矣茲將以月日之吉奉先母祔  
塋先公之塋祇服

殊恩用褻大事思勦玄石以徵永久第顛蒙不類未能  
窺慈懿之萬一而玃疾昏迷復若天奪之魄者舉筆  
涕零莫知所謂蓋悽慘廢閣者屢矣萬不得已姑即  
姻族之所稱述耳目之所睹記忍死悲哽槩舉一二  
以為狀畧事多遺逸語無倫次不孝之罪萬死不足



贖也敢祈 名世鴻筆俯賜採錄揮成隧道之文庶  
聖朝厚終之典有光先母不朽之託斯在而不孝諸孤  
雖死之日猶生之年矣曷勝瀝血哀懇之至不孝男  
甲徵泰徵定徵久徵元徵泣血謹狀

刻條麓堂集跋

語云文章者不朽之盛業信哉

先生正色立三

朝厥功懋著蓋已銘之太常垂之竹帛矣獨其勲業之光著而爲文寔與勲業無兩者先生則不以自炫而韞諸篋笥乃今于諸嗣君始得全藁焉余三復其文若詩宏篇短什如出武庫而覩其色則率皆冠裳珮

玉揖讓於堂陛之間而其音則若聽鈞天  
其味則若烹大饗也眎世之爭奇黷巧以  
有所得而自鳴者殆不啻霄壤然文不在  
茲乎

熙朝文獻在

先生是不可無傳予爲  
先生門下士而又適受

命巡

先生梓里非予傳之而誰也乃校其篇付  
所司梓焉自斯文出而後賢者識其大識  
其小

先生之盛業真不朽矣

萬曆十有五年歲次丁亥孟春吉旦巡按  
山西監察御史門生陳登雲頓首拜跋

重刻條麓堂集後叙

先太師文毅公生平嗜學於載籍無所不披日惟與聖賢對用志不分雖風霆交作耳若無聞冠珮來前目若無見嘗自擬書淫傳癖真有忘寢與食不知老之將至者其於斯道蓋沒身焉耳矣以故山含澤滙歆歆雲霓作為文章楷模髦士自先進名臣南澗楊公皆所陳公等靡不推轂者顧

不肖兄弟生晚復從事佔畢不獲預于黼黻之觀洎登仕籍居卽署始克探討奚囊則什逸四五矣卽如先祖母行畧斷簡僅存而所謂行實詳狀竟求不獲秋霖秋濤一時均賦而秋濤亦已闕文舉斯二端則玄珠失于離朱者豈鮮哉以是思哀哀可知已往歲丙戌南濱陳公以繡斧臨山右不忘先公之好亟求遺稿命敝邑大夫彙

而梓之於時不肖兄弟方斬然在哭泣之  
中扶服蒐輯總總以應嘉命雖嘗勒有成  
書而義例多舛豕魚迭見覽者有遺憾焉  
又十閱歲不肖奉命守河壯爰取前編覆  
加是正稍俸鳩工重刻于懷之公署始賦  
頌終誅章凡為目三十餘卷視昔加詳而  
以先公及我太夫人榮哀實錄附焉先公  
所為三不朽者畧可槩見不肖何假言獨

悲夫義方所貽依然在耳而手澤所寄缺  
焉不獲睹其全也用紀歲月以志哀思云  
是役也郡邑諸大夫相與共藏厥事自先  
公寔寵嘉之不肖謹備書里氏如左以附  
久要之義

萬曆二十三年歲次乙未冬十月望日河南  
布政司分守河北道左叅議前進士禮部  
郎中不肖男張泰徵謹識



河曲任轍同校

武陟縣儒學教諭都勻余顯鳳恭訂  
懷慶府儒學教授河津黃桂芳

訓導昭化吳學詩

岳陽周易

河內縣儒學教諭儀封謝夢龍

訓導監利李夢得

杞縣張克魯同訂